

未 4.1

6

咽喉經驗秘傳



咽喉經驗秘傳



咽喉總論

瘦樵程永培校刊



咽喉者人身呼吸飲食之門戶也咽以嚥物喉以候氣咽則通水穀接三腕喉有九節通五臟以系肺方寸之地受病最險然其症雖繁大要總歸於火蓋少陰少陽君相二火其脉並絡於咽喉故往往爲火症之所結聚君火勢緩熱結於內而爲疼爲腫相火勢速則腫甚不仁而爲痺痺甚則不通痰塞而死火者

痰之本痰者火之標故言火則痰在其中言咽喉則
牙舌亦包羅於內矣夫火有虛實之分虛者或因飲
酒太過或因憤怒或因色慾火痰上攻咽舌乾燥
便如常少陰脉微治宜補虛降火實者或因過食煎
炒炙燂蘊熱積毒其症煩渴二便堅閉風痰上壅脉
弦而數治宜先去風痰後消熱毒然於調治之際又
宜解不宜遏否則表症而峻用寒涼則寒包於外而
熱鬱於中矣內症而峻用寒涼則上熱未除而中寒
復起矣縱或腫勢稍退言語稍通目前以爲獲效其
禍豈有不旋踵而至者哉

通喉痺論

凡喉症之生屬痰屬風屬熱多因鬱火而兼熱毒大
要去風痰解熱開鬱爲極緊至如腫甚不仁則爲喉
痺喉痺者喉中呼吸不通言語不出此天氣閉塞也喉
喉疼噤痛者咽喉不能納唾爲食此地氣閉塞也喉
痺咽噤痛者咽喉俱病此天地之氣俱閉塞也病喉
痺者必兼咽噤痛咽噤痛者未必兼喉痺也更有暴
發暴死者名走馬喉痺俱屬少陰少陽君相二火並
熾經云一陰一陽結謂之喉痺一陰者少陰君火一
陽者少陽相火其脉出於肺氣右關多浮沉而實此



咽喉之重症也治宜辛散佐以苦寒酸利之劑然亦當觀其神而審其脉不可以一概施也使元氣衰而虛火旺者豈可更與之辛散耶斯又善治者變通焉

喉痺論方

喉痺卽纏喉風其腫達於外面且麻且癢且痛治宜辛散佐以苦寒鹹寒牛蒡子山豆根射干黃連黃栢知母玄參童便蘇子麥冬貝母甘草犀角山茨菇桔梗續隨子急治有鍼法吹法吐法急治用膽礬朴硝牛黃爲末和勻吹入喉中又治法用礬錢三巴豆七粒去壳同煨礬枯去巴豆取礬爲細末忌補斂升燥熱同三焦未吹入喉中流出熱痰卽寬

實

診法

咽喉之脉兩寸洪溢上盛下虛脉忌微伏兩寸浮洪而上者溢喉痺也此痰火上湧脉亦如之初用翎毛蘸米醋攪喉中摘去痰蓋醋味酸能收痰隨翎而出又能消積血若乳鵝而不散以小刀就鵝上刺出血用吹法以散火邪而內服射干青黛甘草桔梗梔子黃芩礬石惡實大黃之類隨其攸利以散上焦之熱若腫達於外者必敷以藥加生地韭根汁伏龍肝之類若生瘡或白或赤其白者多痰赤者多血大率與



口瘡同例用薔薇根皮黃栢青黛煎噙細嚥亦解熱毒

喉痺惡寒及寸脉細弱於關尺者皆爲表症宜解寒熱發散之如水漿不得入口者解毒雄黃丸五六粒以醋磨化灌入口內吐出濃痰然後與藥間以姜汁一匙許噙下蓋喉痺惡寒者皆是寒閉於外熱鬱於中姜汁散其外寒則熱得伸而愈矣切忌膽礬酸利之劑點喉反使其陽鬱結不伸又忌硝黃等寒劑下之反使其陽下陷入裏則禍不旋踵矣東垣云寸脉不足乃陽氣不足宜用表藥升提其氣以助陽也然

此亦言寸脉沉伏而實如小於諸部而有喉症者乃
可用此法如果寸脉微小或元氣耗於上卽是陽虛
應如肺絕喉痺斷不可辛散須要治者領畧會意
喉痺不惡寒及寸脉實大滑數有力於關尺者皆屬
下症宜芒硝青黛等寒藥降之或白礬等寒劑收之
東垣云兩寸脉實爲陽盛陰虛下之則愈故用此治
急喉痺如鼓應桴或三部俱實亦可用此法也

急喉痺脉浮數而細微鼻聲如鼾喉鳴如鋸者乃肺
絕之候速宜人參石膏姜汁竹瀝化開救之可冀萬
一近多束手畏尾竟無挽回亦時俗之通弊防招譏

議也

喉痺屬血壅者宜茜草一兩煎服能降血中之火或用馬鞭草搗自然汁醋和服或用射干片噙嚥汁下皆破血之劑也

喉痺屬虛火者用藥遵內經從之法桔梗甘草升麻玄參防風羌活荆芥人參白朮茯苓之類少加姜附爲向導須頻頻服之不可驟用寒涼近俗不明此理峻用苦寒腫勢稍退語言稍清卽爲獲效不知邪熱未除被寒鬱閉毒卽內陷喘促頓作不可治矣

喉痺鄉村皆相似者天行運氣之邪治必先表散之

大忌寒酸點下鬱其邪於內而不得出其病有二
屬火經云少陽所至爲喉痺宜仲景桔梗湯或面赤
斑者爲陽毒宜以陽毒諸方汗之一屬濕經云太陽
之勝火氣內鬱爲喉痺宜活人方桂枝半夏甘草湯
或面青黑者屬陰毒宜以陰毒諸方下之

外感風寒作喉痺或有瘡或無瘡通用甘桔湯加荆
芥連翹牛蒡子防風竹茹活人用半夏桂枝甘草各
二錢五分加生姜煎湯服治暴寒中人咽痛之症本
事治喉痺用白礬五分为末雞子清一枚調勻灌入
喉中立效或敷於外取澄清降濁之意於病之輕重

皆宜

治法凡例

凡喉症一二日腫痛三四日內象有形每到三日必發寒熱或頭痛刻刻吹藥總不可緩即可知生死在幾日之內

凡喉症至五日而重如三日前症雖重尚未成膿藥能消散若過五六日患處多成膿縱使穿破必爛成窠而難愈爛處須多用口疳藥多加龍骨珍珠凡傷寒後患連珠蛾及閉喉者不治其症喉項強硬目睛上視故多不治

凡患喉症勢若輕緩一二日未即發寒熱若至第三日增寒壯熱其勢必重須問其大小便通利否二便若通此不過浮游之火升越咽喉宜內服消風清熱降火解毒之劑即愈若二便不通乃內有實火非用降火解毒重劑與通利二便之藥斷難取效症有輕重故治有緩急也亦要問其頭痛否如痛則兼傷寒為難治之症施與尤有不同處尤云頭痛則兼傷寒難治施云凡喉症俱要頭痛痛則可治不痛則難治何得以頭痛必兼傷寒為難治乎

凡喉症初起一二日用碧丹漸漸加多金丹勢凶者金丹為君或單用金丹方能鉤出頑痰

凡喉症必俟大便去後方可望痊如大便閉結不可輕許其愈

凡喉症初起大便秘結宜大黃玄明粉下之則火降而易痊若至五六日久不食而大便閉甚用之立斃蓋因病久胃氣已虛元氣已弱故禁用硝黃雖大便秘甚亦宜蜜導等法此秘訣也

凡咽喉症凶者面發腫白亮無光彩脉沉微無力是神氣外洩無陽之症斷不可治若面發紅腫脉洪大有力症雖極重是有元氣火氣盛治之易痊面上放光而色白者不治雖放光而色紅者可治此屢驗過

因腫而放光也

凡喉症無痰者不治

如欲出痰以皂角未少許吹之

凡喉症先碎須先用長肉藥吹後用碧丹

凡喉症須吹藥四五管方可出痰必出痰三四次可以全愈出痰初管藥必用金丹多爲要必直對喉中重吹吹過卽提出管恐痰乘藥嘔出故也

凡吹藥非惟腫破患處要吹併四圍好肉上亦要吹之方不延開

凡唇上乾而難吹藥者或用蜜潤或用溫湯濕之方可吹藥



凡口舌等症吹藥後如舌上無涎或如乾橘皮者不治

凡遇口舌腐爛血出不治一

凡吹喉內藥須用氣和平者吹當周徧爲妙

凡用碧丹看症凶冰片多於甘草將愈時甘草多於冰片

凡治口疳用絲綿攪切不可用青布恐傷處致痛

凡喉症雖凶甚若發於外而不見死症者治之必愈惟纏喉風及傷寒喉閉爲最重難治

凡喉中無形而止喉痛者燈草灰多用乳鵝亦宜多



用

凡腮口內腫爛用筋縛絲綿蘸水輕攪患處痛者用藥必愈若不知痛者卽係死肉難愈

凡喉症連胸腫紅此係肺癰必用蜜調藥加百藥煎爲妙

凡舌腫脹滿口吐舌在外難以納藥者用姜蠶牙皂製過爲極細末等分和勻用少許吹之鼻中牙關自開痰涎自出然後用筋捲綿蘸甘草湯潤其唇舌後用四味口瘡藥多加上好冰片頻吹自愈

凡舌腫大用生黃栢加冰片敷之若出血用炒黃栢



加冰片敷之

凡牙關緊閉用一字散吹入鼻中卽時吐出頑痰愈
凡婦人喉症腫痛有因經閉致火上升而患者宜服
通經藥經通而喉自愈

凡患舌喉癰如大便閉藥內加元參明粉大黃同
煎服小便不利煎藥內加六一散調服之甚效此心
法也

凡患牙癰牙根紅腫但牙關不開口能開合先用碧
丹金丹合吹牙根外用黃熟香削成鑿子樣漸漸搥
進牙門則牙漸開卽將金丹吹入患處